

malj, vien dal Caiero, parti a di 13; dice, el magnifico nostro consolo de Damascho fo davanti dal signor soldan, a di 11, *unde* l' fo domandato l'armada sua, et fo parlato de le lettere del Soffi. Li fo risposto per el magnifico consolo arditamente; le parole non ha saputo dir, per esser costuj hom de puocia condition, però ve scrivo cussi sciente, che *item* dico che el torziman nostro parlò in favor del nostro consolo et nation nostra, et per tal parole li fo risposto per el signor soldan brute parole, *imo* volse farlo metter abasso per farlo batter, et per pregiare de molti ammiraglj fo levato, *unde* mandò i nostri a caja de Madraglas et li sono. Se dice, el soldan domanda ducati cinquanta milia; giudicasse se conzerà in XXX milia, *unde* spero sarà in effecto de zogo de danarj.

81\* Magnifico et generoso domino Benedeto Guoro  
..... al clarissimo missier Piero Capelo,  
al magnifico missier Piero Guoro, a missier Priamo  
da Leze de san Agustin, a missier Lunardo Emo et a  
missier .... Morexini.

82 *Dil mexe di mazo 1511.*

*A di primo.* In colegio il principe non fu per non si sentir, *tamen* non sta in leto, ma si guarda. Intronò li cai di X: sier Andrea Loredan e sier Andrea Magno; et sier Francesco Foscari, el cavalier, era fuora in villa, non introe fino il suo ritorno.

*Dil provedador Griti, date eri, a la Badia.* Chome à aviso, i nimici francesi aver principiato a disfar il ponte, fece sopra Po, et erano per levarsi; dove si andaseno, non si sapea.

Da poi disnar fo pregadi per risponder a l'orator a Costantinopoli, nostro, qual richiede li bassà, volendo la Signoria ajuto, essi bassà voriano in don ducati .... milia; et posto le parte, per i savij di colegio, erano do opinion: alcuni darli, altri non li dar, perchè non si arà alcun subsidio. Parlò sier Piero Balbi, savio dil consejo, sier Alvixe da Molin, savio dil consejo, sier Alvixe Zustignan, è di pregadi, *quondam* sier Marco, sier Francesco Pasqualigo, viem in pregadi, *quondam* sier Filippo, sier Zorzi Corner, el cavalier, procurator, savio dil consejo, et ultimo sier Zorzi Emo, fo savio dil consejo, qual li vol dar ad ogni modo, et cussi d'acordo fo rimesso a doman, perchè altri voleva parlar; et fo comandà grandissima credenza e sacramentà el consejo.

*Dil provedador Griti vene letere, date eri*

*da sera.* Come i nimici disfevano il ponte e cargavano le l'oro artelarie sopra burchi; si dice vano a Parma, altri a la Mirandola per aver quel locho, ch'è di la fiola di missier Zuam Giacomo Triulzi; altri dicono, i voleno andar a trovar il nostro campo al Final.

Fu posto, per li savij, una letera in corte a l'orator nostro, che saria bon tegnir la praticia col curzense im piedi, e ch'el non vadi fuora de Italia, ma resti a Mantoa.

*A di 2.* Il principe non fo in colegio; et vene letere di la corte.

*Di Bologna, di l'orator nostro, di 27, 28, et 29.* Come el papa li à dito, sguizari hanno fato movesta a Belinzona contra il stato di Milan, e il papa havia dato certo beneficio al cardinal episcopo sedinense, ch'è appresso sguizari, el qual l'imperator l'havia dato al curzense, el qual curzense parti da Bologna, e torna a l'imperador. *Item*, il papa non vol più la nostra armata im Po, levandossi francesi.

Da poi disnar fo pregadi; non fo il principe. Pur in materia di Constantinopoli; et, leto le do opinion, molti parlono, *videlicet*: sier Antonio Loredan, el cavalier, non vol ajuto di turchi; li rispose sier Alvise da Molin, savio dil consejo, poi sier Antonio Grimani, procurator, savio dil consejo, poi sier Zorzi Emo, fo savio dil consejo, poi sier Andrea Trivixam, el cavalier, fo savio a terra ferma, poi sier Alvixe Pixani, savio a terra ferma, et sier Gasparo Malipiero, fo avogador, et andò le parte, et *nihil captum*; et fu preso la indusia a doman, et con grandissima credenza. Et nota, sier Alvise da Molin e sier Piero Lando erano di una oppinione, el resto di savij di una altra.

*A di 3, la matina.* Il principe non fo in colegio. Sier Christofal Moro, venuto podestà di Padoa, in loco dil qual è andato sier Nicolò di Prioli, vene a referir, e disse di quelle fabbriche e fortification di Padoa, e fo terminato ultimarle; et laudato da sier Bernardo Bembo, dotor et cavalier, vice doxe.

*Dil provedador Capello, dal Final, di 30. De occurrentiis.*

*Dil provedador Griti, da la Badia.* Chome francesi si levavano di sora Po, dove erano alozati, certissimo.

Da poi disnar fo pregadi per ultimar le letere, si à scriver a Costantinopoli, a l'orator. Parlò sier Piero Lando, savio a terra ferma, per la sua opinion, vol mandar li danari; poi sier Piero Duodo, el consier, poi sier Alvise da Molin, savio dil consejo, poi sier Zorzi Emo, e, ultimo, sier Francesco Pasqualigo,